

Deliberaun nú /2019, Loron.....fulan.....
Kona-ba Regulamentu ba Hili Membru Foun ba Conselho de Imprensa

PREAMBULU

Tuir Lei Nú 5/2014 kona-ba Lei Komunikaun Sosiál Artigu 42.^u nú 1 no 2 hatete Conselho de Imprensa nu'udar entidade administrativa independente no halo nia atribuisaun no kompeténsia ne'ebé la submete ba diresaun ka orientasaun poder polítika ruma nune'e mós nú 2 hatete Conselho de Imprensa nia estatutu aprova ho Dekretu Lei ida.

Iha mós artigu 43.^u atribuisaun sira ne'ebé esensial katak; Conselho de Imprensa iha atribuisaun importante sira atu sai matan ba konduta profisionál no étika kona-ba profisionál sira jurnalizmu no operadór meu komunikaun sosiál nian sira, nune'e mós garante atu kumpri kondisaun sira ba asesu no hala'o atividade jornalística sira.

Iha Dekretu Lei nú 25/2015 kona-ba Estatutu Conselho de Imprensa nian iha artigu 17.^u nú 8 hatete katak; Conselho de Imprensa mak iha kompeténsia atu organiza eleisaun ba representante jornalista no órgaun komunikaun sosiál sira tuir nia regulamentu rasik.

Iha artigu 2.^u husi Dekretu Lei nú. 25/2015 kona-ba Estatutu Conselho de Imprensa iha alinea 3 hatete katak to'o tinan rua hafoin liu tiha loron 1, fulan janeiru, tinan 2016 ka fó tiha pose ba ninia membru sira bazeia ba saida mak haree tuir mai, Conselho de Imprensa sei aprova regulamentu kona ba eleisaun ba membru sira Conselho de Imprensa nian hosi jornalista no órgaun komunikaun sosiál sira nian.

Ho baze legál sira iha leten ne'e mak fó poder ba Conselho de Imprensa hodi bele kria rasik nia regulamentu internál ida atu bele uja hanesan mekanismu ida ba hili membru Conselho de Imprensa foun sira atu bele servisu Conselho de Imprensa nian loron-loron. Ho rajaun sira iha leten ne'e mak sei hatur tuir artikuladu sira tuir mai ne'e.

Kapitulu I
Ámbitu no objetivu

Artigu 1.^u
Ámbitu

Deliberaun ida ne'e nia ambitu mak tuir mai ne'e;

- a. Regulamentu ida ne'e regula kona-ba lala'ok ka mekanismu ne'ebé diak atu hili kandidatu membru Conselho de Imprensa sira;

- b. Hodi halo preparasaun kona-ba inísio prosesu selesaun to'ó etapa ikus atu hili membru Conselho de Imprensa foun sira;
- c. Kandidatu membru Conselho de Imprensa sira ne'e mai husi asosiasaun jornalista no mídia-nain sira;
- d. Prinsípiu jerál ne'e uza atu hili membru foun sira.

Artigu 2.^o

Objetivu

Objetivu husi regulamentu ida-ne'e mak:

- a. Regulamentu membru Conselho de Imprensa nu'udar tipu ida atu inísia prosesu forma ekipa no lalaok eleisaun ba membru foun sira;
- b. Prosedimentu ida-ne'e mak Conselho de Imprensa uza nu'udar báze legál atu halo eleisaun ba membru foun sira.

Kapitúlu II

Kandidatu Sira

Artigu 3.^o

Kandidatu sira

Kandidatu ba membru Conselho de Imprensa mak;

- a. Representante nain rua husi jornalista sira ne'ebé asosiasaun jornalista mak hili liuhosi eleisaun;
- b. Representante nain ida husi órgaun komunikasaun sosiál ne'ebé asosiasaun proprietaria mídia mak hili liuhosi eleisaun;
- c. Sidadaun nain rua ne'ebé matenek no esperensia iha area mídia no jurnalizmu.
- d. Sidadaun nain rua ne'ebé temi iha alinea (c) iha artigu ida-ne'e, ida tenke jurista.
- e. Sidadaun nain rua ne'ebé temi iha alinea (c) ne'e Parlamentu Nasionál mak hili direktamente.

Artigu 4.^o

Rekezitu husi Kandidatu sira

1. Rekezitu ba kandidatu membru foun mak;
 - a. Sidadaun Timoroan ho idade minimu tinan 25 no iha maturidade atu foti desizaun;
 - b. Sidadaun ne'ebé iha kapasidade jurídiku tomak;
 - c. Sidadaun ne'ebé iha komprimisiu ba liberdade imprensa no liberdade espresaun;
 - d. Sidadaun ne'ebé harii relasaun no komunikasaun diak ho ninia konstituente sira;
 - e. Sidadaun ne'ebé iha kapasidade, integridade no independénsia, no iha kompeténsia teknika no profesionál tuir estatutu Conselho de Imprensa.

2. Labele sai kandidatu ba membru foun mak;
 - a. Ema ne'ebé tinan rua liu ba kotuk titular ka kargu iha órgaun soberania ida, iha órgaun poder lokál lideransa komunitáriu;
 - b. Ema ne'ebé tinan rua liu ba kotuk nu'udar dirijente ka membru partidu nian;
 - c. Ema ne'ebe halao'o knaar relasaun públika, asesór imprensa ka komunikasaun sosiál;
 - d. Ema ne'ebé nudar ofisiais mídia partidu politiku-nian;
 - e. Ema ne'ebé nu'udar funsionáriu públiku;
 - f. Ema ne'ebé ninia antesidente hetan kastigu ou hetan pena tuir Lei Kriminal Timor-Leste.

Kapitulu III

Órgaun Supervizaun, Elejibilidade, Garantia Independénsia no Inkompatibilidade

Artigu 5.^u

Órgaun Supervizaun

Conselho de Imprensa mak:

1. Se aplika regulamentu ida ne'e hosi loron ne'ebé hatuur tiha data ba kandidatu to'o loron eleisaun;
2. Foti medida ba infrasaun sira hasoru prinsípiu hirak ne'ebé hatuur ona iha regulamentu ida ne'e.

Artigu 6.^u

Elejibilidade, garantia independénsia no inkompatibilidade sira

1. Bele sai membru Conselho de Imprensa nian sidadaun sira ne'ebé iha tinan boot ona ne'ebé goza sira ninia kapasidade jurídika tomak.
2. Sei hili membru sira Conselho de Imprensa nian entre sidadaun sira ne'ebé iha kapasidade, integridade no independénsia, kompeténsia téknika no profisionál.
3. Labele hili ema atu sai membru Conselho de Imprensa nian maka:
 - a. Ema ne'ebé nu'udar, ka iha tinan rua liubá, titulár ba kargu iha órgaun soberania ida, ba-iha órgaun poder lokál ka lideransa komunitária;
 - b. Ema ne'ebé nu'udar, ka iha tinan rua liubá, dirijente partidu polítiku nian;
 - c. Ema ne'ebé hala'o knaar relasaun públika ka asesór imprensa, komunikasaun ka imajen nian;
 - d. Ema ne'ebé nu'udar funsionáriu públiku;

- e. Ema ne'ebé nu'udar, ka iha tinan rua liubá, proprietáriu ka membru administrasaun jerénsia ka diresaun kualkér órgaun komunikasaun sosiál nian.

Kapitulu IV Prosedimentu Eleisaun

Artigu 7.^u

Eleisaun reprezentante jornalista no órgaun komunikasaun sosiál sira nian

1. Representante sira jornalista no órgaun komunikasaun nian hili liu hosi votasaun livre, diretu sekretu no pesoál eleitór sira nian nu'udar prevee iha lei.
2. Sei hili ema kandidatu sira ne'ebé maka hetan votu barak no válidu
3. Bainhira hetan empate maka sei hala'o votasaun dala-ida tan entre kandidatu sira ne'ebé hetan votu barakliu.
4. Bele kandidata-an no ema hili nu'udar representante jornalista sira nian jornalista sira ne'ebé iha kapasidade ho karteira profisionál ne'ebé fó-sai hosi Conselho de Imprensa ne'ebé la hala'o knaar sira maka la hanesan ho profisaun jornalista nian tuir artigu 17.^u Lei Komunikasaun Sosiál nian no ema propoin hosi proponente mínimu porsentu 5 hosi jornalista sira ne'ebé iha kapasidade ho karteira profisionál fó-sai hosi Conselho de Imprensa.
5. Bele kandidata-an no ema hili nu'udar representante órgaun komunikasaun sosiál sira nian na'in ka ema sira ne'ebé okupa kargu jestaun ba administrasaun ka diresaun órgaun sira komunikasaun sosiál nian ne'ebé rejista ona ba-iha Conselho de Imprensa ne'ebé apresenta hosi proponente mínimu porsentu 10 hosi órgaun komunikasaun sosiál ne'ebé rejista ona ba-iha Conselho de Imprensa tuir artigu 28.^u Lei Komunikasaun Sosiál nian.
6. Iha direitu atu vota ba representante jornalista sira nian maka jornalista sira ho karteira profisionál fó-sai hosi Conselho de Imprensa, no sira la hala'o knaar sira ne'ebé la hanesan ho profisaun jornalista nian tuir artigu 17.^u hosi Lei Komunikasaun Sosiál nian.
7. Iha direitu atu vota ba representante órgaun komunikasaun sosiál sira nian maka representante sira ne'ebé hili tuir lei ba órgaun komunikasaun sosiál sira ne'ebé rejista ona baiha Conselho de Imprensa, tuir proposaun votu ida ba kada órgaun komunikasaun sosiál.

8. Conselho de Imprensa mak iha kompeténsia atu organiza eleisaun ba representante jornalista no órgaun komunikasaun sosiál sira nian tuir regulamentu rasik.
9. Bainhira hetan ona rezultadu eleisaun nian, Conselho de Imprensa fó-hatene naran representante sira ne'ebé hili ona ne'e ba Parlamentu Nasionál.

Artigu 8.º

Kompozisaun kuorum

Kompozisaun kuorum mak:

- a) Mai-hosi membru asosiasaun no jornalista ativu sira;
- b) Mai-hosi proprietaria média sira.

Artigu 9.º

Kontazen votu no validade

Kontazen votus:

- a) Conselho de Imprensa mak organiza kontazen votu;
- b) Kontazen votu halo direta no anunsia kedas iha fatin votasaun;
- c) Conselho de Imprensa mak prepara akta rezultadu eleisaun no haruka ba Parlamentu Nasionál;
- d) Eziste votu validu no invalidu ne'ebé deside molok eleisaun.

Artigu 10.º

Anunsia rezultadu

1. Conselho de Imprensa mak anúnsia rejultadu final eleisaun nian no haruka ba Parlamentu Nasionál;
2. Lista membru Conselho de Imprensa foun publika iha Jornal da República.

Kapitulu V

Toma de Pose, Hili Prezidente no Mandatu

Artigu 11.º

Tomada de Pose

Parlamentu Nasionál mak fo pose ba membru Conselho de Imprensa sira.

Artigu 12.º

Eleisaun Prezidente Conselho de Imprensa

Eleisaun presidente Conselho de Imprensa nian halo tuir artigu 23 Estatutu Conselho de Imprensa kona-ba eleisaun presidente.

Artigu 13.^u

Mandatu Membru Conselho de Imprensa nian

Mandatu Conselho de Imprensa sei halo ba tinan 4 ne'ebé bele hafoun hikas fali dala ida deit tuir artigu 46.^u Lei Komunikasaun Sosaial.

Kapitulu V

Finál no Tranzitóriu sira

Artigu 14.^u

Knaar Revizaun Nian

Membru foun Conselho de Imprensa mak halo revizaun ba regulamentu ida ne'e hafoin hetan tomada de pose husi Parlamentu Nasionál.

Artigu 15.^u

Norma subsidiariu sira

Norma sira ne'ebé la temi iha regulamentu ida ne'e sei bele uja hodi halo hamonizasaun ba aplikasaun ninian.

Artigu 16.^u

Tama Iha Vigór

Regulamentu ida ne'e tama iha vigór hafoin hetan aprovasaun iha Plenária Conselho de Imprensa nian.

Aprova hosi membru Conselho de Imprensa iha loron fulan tinan 2019

1. **Virgílio da Silva Guterres:** _____
Prezidenti
2. **José Maria Ximenes:** _____
Membru
3. **Hugo Maria Fernandes:** _____
Membru
4. **Paulo Adriano da Cruz Araújo:** _____
Membru
5. **Francisco Belo Simões da Costa :** _____
Membru